



*La Reyne de Saba vient voir Salomon avec presens precieux, & admire sa science & perfection.*



A renommée du Roy Salomon fut tellement espanduë par l'Vniuers, que la Reyne de Saba vint au nom du Seigneur pour le tenter par questions difficiles, & icelle estant entrée en Ierusalem avec grande compagnie, richesses, & chameaux chargez d'espiceries & or sans nombre, se presenta à Salomon, & luy dist tout ce qu'elle auoit projecté en son cœur, & Salomon luy enseigna toutes les paroles qu'elle auoit proposées, & ne furent aucunes ignorées du Roy. Adonc la Reyne de Saba considerant la grande sapience de Salomon, les bastimens somptueux qu'il auoit fait edifier, la diuersité des viandes de sa table, les habitations de ses seruiteurs, & l'ordonnance de ceux qui administroient toutes choses à eux necessaire, & les holocaustes qu'il offroit au Seigneur, elle fut lors transportée d'esprit, & dit, Ce que i'ay oüy en ma terre de toy & de ta sapience, ô Roy, m'estoit incroyable, iusques à ce que mes yeux ont veu plus que ie n'en auois pas oüy reciter, car ta sapience & tes œuvres sont plus grandes que la renommée. O bien-heureux sont tes gens & seruiteurs, qui sont tousiours en ta presence, & oyent ta sapience. Le Seigneur ton Dieu en soit benist, auquel tu as pleu, & qui t'a mis au thrône d'Israël pour faire iugement & iustice.